



QVÆSTIO MEDICA.

CARDINALITIIS DISPVATIONIBVS

MANE DISCVTIENDA

IN SCHOLIS MEDICORVM,

die Iouis xxvii. Martij

M. ANTONIO MORAND.

DOCTORE MEDICO, MODERATORE.

An somnus visceribus vigiliâ jucundior?

I.

QVI Cœlum ad volubilitatem rotundauit, cum hac indole & hoc condimento res effecit vt nihil esse voluerit in opere naturæ cuius aliquæ vices desiderarentur; hinc persuasum alternatim cessare arua, & hoc si patiantur ruris spatia, fructuosum. Hinc labor qui optimos quosque citat, ad quietem eosdem reuocat, vnde manat multiplex varietas & commutatio ad actionis suauitatem; propterea que somnus qui perfugium est omnium laborum & solitudinum communi ex præscripto, affecta vigiliis corpora recreat, quæ per eum mens & corpus bene placidèque conquiescant.

II.

SOMNVS circumscribitur cessatio sensus principis & communis exterorumque sensuum ad salutem anima-

lium; quemadmodum vigilia decernitur quoties ipse ille liber est & solutus, adeout parata & prompta sit extemplo virtus animalis quæ induat imposita munia: & ne lateat in occulto verum, alternis omnia quæ vigilant dormiunt, extremis vicissim vnâ in eodémque loco conclusis; tantúmque fructum vtilitatis præbent dissociata ista, vt his perfectissimorum animalium vita contineatur: proindeque exultatum abeant qui Libycam gentem Atlantes, ceu Neptuniis in Ægis degentes nullo premi somno fabulantur, nec tutiùs illi cautiùsque agunt qui plantas vinculisque coërcitos fœtus tenellulos consopiri, proferunt in solem.

III.

EFFINGATVR somnus mortis exemplar atque speculum, vita ipsa vigilia sit breuissimi quantumvis temporis, turpiter & nequiter faciat qui semisomnis jacet, vel dum media dies coquente desuper sole feruet ardentius, & hoc sit pluribus antelucanum, nec ante multi diducant oculos hesternâ graues crapulâ quam appetere nox cœperit vt miserrima miseria nefandóque scelere officia lucis noctisque peruertantur, tenebris noctium dimidiæ parti vitæ cuiusque gaudia auferentibus; quia tamen ea quæ sentiunt aluntur necessario, & vis quæ nutrit gnauiter munus suum obit expeditiusque opus exerceat nobis consopitis quam vigilantibus, somnus cui salutem debemus omnem primario loco sit & sedeat in puppi non renuimus.

IV.

SAPIVNT illi pleno pectore qui corporis opes in visceribus condunt, omnémque propterea curam & diligentiam in iis partibus tuendis conseruandisque adhibent, quod omnes assequuntur facile, quieti quoties corpus datur, tunc enim sopore placantur artus languidi, virtusque naturalis viuacior, in momenta vegetiorem acriorémque se præbet, vt agendo magis quam desidendo reficiatur ignis adinstar, sicque perficitur coctio intus & in ambitu, alimen-

tumque corporis substantiæ nostræ quodammodo simile ,
quia iucundum & dulce , in eam tandem facessit atque con-
uertitur quam tum alit , tum auget , ea tamen lege vti per id
temporis quoniam suscitatur suavis, corpulentus & copiosus
vapor in cerebrum , sensus princeps indicibus oculis , possit
obligari.

V.

QUAMVIS esus & potus ita sint de naturæ sortibus
vt in iis plurima somni paratura sit , non propterea
funditus aut contumaciter repudium renuntiabitur longiori
vigiliæ , labori , defatigationi , deurenti frigori , æstui , bal-
neo , leni aquarum fusurro , tenebris , curis grauioribus , le-
ctiori quæ tædio sit , amœniori sono vel minus eleganti , si-
lento , repressæ cogitationi , solitudini , edicunt enim etiam
ista cessationem motus & sensus , non tamen omnifariam , vt
sicuti vigilia non consentit cum irrequieto motu , intentô-
que sensu , sed veloci , soluto & expedito , ita nec somnus
cum omnium munerum vacatione (hujus rei testes &
conscijs sint somnambuli) vel perpetua ; cumque nulla
queat anima sufficere tot operibus , aut animal juges inire
vigilias , per quas vis spirituum ingens effunditur somnus
recreator corporum , redintegrator virium , probator va-
letudinum , pacator operum , medicus laborum , cui legi-
time fruendo dies cedit , nox legem facit , inclinatis mi-
serorum mortalium rebus , citus interueniat necesse est.

Ergo somnus visceribus vigiliâ iucundior.

Proponebat Lutetiæ CAROLVS DE LAVAL,
Parisinus, A. R. S. H. M. DC. LIX.

*cette these se trouve dans le recueil
in folio tome VIII th. 1097. —*

[Faint handwritten notes at the bottom of the page]